



Sujet 2006: Schnäggetämpo!
Begegningszone Lieschtel

In Lieschtel isch wiider emool öppis yygfüert worde, s isch zum Schreie; e sogenannti Begegningszone mit Tämpo **20** nit numme im Winter, wens duet schneie.

Nei au im Summer müesemer jetz ummenander schlyyche und fascht all füzg Meter inere nöie Schyggane uswyyche oder halt ebbä eifach drüber faare.

Mit mym alte Charre bini chürzlig d Seestrooss uufegfaare. By der Yyfaart hani gmeint i syg uffere Buggelpischte, äso hets dätscht und denn isch my Chischte in d Chnüü gange, jetz weissi, do het d Begegningszone aagfange!

Jetzt goots deruff ich gib wiider Gas, doch Halt was stoot uf dere Tafäle? < Ihr Tempo 25 > das cha doch nit sy, my Tachonoodle isch jo no ganz unde und macht kei Wank, also das Tämpo **20** macht mi no ganz chränk.

Ändlig hanis gschafft, jetz bini dobe mitem letschte Schwung hani gegenä Fischmäart abbooge. Jetzt goots erscht los, das isch nit glooge, muesch di im Schnäggetämpo dur d Fuessgänger duure blooge.

Nach ettlichem Kurve und Ummenanderschlyyche hanis gschafft, i han es Plätzli gfunde, wo für mis Wägeli isch gmacht. Doch jetz chunnt s nööchscht Problem, ich weiss nit in was fürenere Zone woni jetz bi gstrandet.

Vor luuter Zonewirwar weisch bald nümme wo dass du weli Charta muesch yyschtelle und wie lang ass me do cha blyybe ooni dass e Staposchugger chunnt cho schryybe und dii mit emene Buessezedel duet vertrybe.

Schliesslig hanis denn doch gschafft und ha uusegfunde in was fürenere Zone ich mi ha befunde. Das isch die sogenannti Schnäggezzone, do chasch nümme als Normale woone.

In dere Zone gits au no ganz verschiideni Kommissionen wo au immer wiider füäre zu Diskussione. E ganz e Spezielli isch die sogenannti Reklamekommission (d Mitglicher si nit vo Lieschtel sondern us der Region). Die meine, si syge zueständig für d Beschryftige und sunschtige Wäärpegägs im Stedtli und vergässe derby, dass Villes halt het Tradizion, wemme das würdi verbiäte wärs e Hoon.

Dr Allemann und dr Plattner, zwee vo öisne Würdedrääger usem Roothuus hai jo au für d Fasnecht so Superideen entwikklet und in der Präss am Chienbäse-Umzuug ummepikchlet. Aber zum Glück het sich öise FKL-Prääsi dr Döö nit ume Finger lo wikchle, är het die zwee chönne uufkläre wieme z Lieschtel halt dänkt und waltet und mängmool gwüssi Sache halt echly andersch gstatet oder verwaltet.

Im Schnäggetämpo bini jetz dur d Lieschtler Gasse duure gschlyche, ich weiss numme nit so rächt wieso sich s Stedtli duet Begegningszone nennä, wenn doch meischtens alli pennä und das Gstürm vo dene Zone numme vom ghöre säge kenne.

Mir gönge jetz aber ab uf d Gass und gniesse d Fasnecht das Joor als Schnägge. Aber kei Angscht mir löie öis vom Tämpo **20** nit lo lumpe, als Schnägge chönne mir zwar nit go gumpe aber mir döie gässle, ruässe und pfyffe und so in de Lieschtler Gasse e Huuch vo Begegnig lo ryffe.

Wie allewyl isch am Fasnechtszyschdig d Ladäärne-Uusstellig in der Roothuusstross vom zwöi zmidag bis am nüüni zobe!